

ԴՐԱՄԱՏԻԿ ՀՈԳԵՎԻՃԱԿՆԵՐԻ ՊԱՏԿԵՐՈՒՄԸ ՈՌԻՔԵՆ ԶԱՐԴԱՐՅԱՆԻ ՆՈՐԱԿԵՊԵՐՈՒՄ

Զարդարյանի՝ հոգեբան գրող լինելու մասին առաջին անգամ ընդգծել է Զապել Եսայանը «Ցալալույսին» նվիրված գրական ասուլիսների ժամանակ. «...անիկա Խարբերդն էր, իր տառապանքին ներքև հզոր և նույնիսկ իր տառապանքով հզորացած, անիկա ոգին էր մեր ամենեն քաղցրորեն տխուր բանաստեղծությամբ մը օծուն հայ գավառին որուն վշտագին բայց ժպտուն, հալածական բայց երազատես զավակներուն ցավի և ուրախության վանկերը, աչքերու հրայրքը, հոգիներու սարսուռները կը փոխանցեր մեզի իր գեղեցիկ և հանկուցիչ արվեստին միջոցով»¹: Հակառակ կարծիքին է Հակոբ Օշականը՝ գտնելով, որ Զարդարյանին չի հաջողվել հոգեբանական կերպարներ ստեղծել. «Զարդարյանի պատմվածքները տեսակ մը խառնուրդ են բարքերու, ձգտումներու, մտածումներու ու դեռ ուրիշ բաներու: Այս տարտղնումին մեջ հոգեբանությունը, այսինքն հոգեկան վիճակներ ստեղծելու, ամոնց զարգացումին հսկելու, ամոնց ուռելուն և հետո քայքայվելուն մեքենականությունը վարելու աշխատանքը ու շահագործումը կոտորակված ու պակասավոր տեղի կ'ունենան»²: Չկիսելով Հ. Օշականի գնահատականը, որի՝ Զարդարյանին նվիրված ընդարձակ ուսումնասիրությունն առանձին դեպքերում օբյեկտիվ է ու անկողմնակալ, փորձենք առանց սուբյեկտիվիզմի, առարկայորեն ցույց տալ Զարդարյանի կերպարաստեղծման հոգեբանական կողմերն ու եղանակները: Հոգեկերտվածքը և դրամատիզմը Զարդարյանի նորավեպերի ներհատկություններից են, ուժեղագույն գծերից: Գրեթե բոլոր նովելներում Զարդարյանը պատկերել է տարբեր իրադրություններում հայտնված մարդկանց հոգեվիճակներ՝ իրենց ուրույն ներաշխարհով և ողբերգականությամբ: «Եկեղեցիին առյուծը» ստեղծագործության մեջ քահանայի դրաման պայմանավորված է թուրքերի հարձակումներից հայերի անպաշտպանվածությամբ և դրանց դեմն առնելու անգործության գիտակցությամբ: Կով Առաքելի հոգեդրաման ծնվում է կիսավեր տան փլուզումը կանգնեցնելու շարունակական մաքառումներից: «Վա՛խ, ես մեռնեի» նորավեպում արտացոլված է նվաստացած, տնից վռնդված, բայց հավատարիմ հայ կնոջ՝ Հայկուհու հոգեկան դրաման, որն անբարո կյանք վարած ամուսնու մահն ընդունում է խորին հուսահատությամբ ու ողբով: «Տերտերին

¹ Գրական ասուլիսներ, Դ. Կ. Պոլիս, 1913, էջ 10-11:

² Օշական Հ., Համապատկեր արևմտահայ գրականության, հտ. 7, Անթիլիաս, 1979, էջ 310:

հարսը» պատուում ունեւորւած կնոջ դրամատիկ կերպար է ներկայացւած՝ հան-
ձին Դոռմերի: Այդ կինը նույնպէս, ինչպէս նախորդ երկի հերոսուհին, պատվա-
խնդիր է, սակայն ի տարբերութիւն Դայկուհու՝ նրա դրաման ծնունդ է առնում
երկրորդ անուսնու (առաջինը մահացել էր) կողմից անուշադրության և անտար-
բերության ցուցաբերումից: Շատ ավելի նուրբ հոգեվիճակներ են ներկայաց-
ված «Սև հավը կանչեց» վիպակում, ուր գրեթէ բոլոր հերոսներն էլ տառապող
հոգիներ են: Գերդաստանի ավագ որդու (խոջաքաշի Նիկո) և կրտսեր հարսի
(Նունիկ) անխոհեմ արարքը՝ սեռական կապը, հանգեցնում է ընտանեկան ող-
բերգության: Հոգեկան առաջին հարվածը ստանում է Սիմոյի որդին, ում մանուկ
սրտին անդարմանելի ցավ են պատճառում մոր և հորեղբոր գաղտնի հարաբե-
րութիւնները: Այդ անարգանքը գերեզման է իջեցնում Նիկոյի կնոջը: Ողբերգա-
կան կերպար է և պառավ Հռփիկը, ով ճիգեր է գործադրում ամեն գնով փրկելու
գերդաստանի պատիւը: Սակայն ամենադրամատիկ կերպարները անուսիններ
Սիմոն ու Նունիկն են: Նունիկը, չնայած անուսնական դավաճանությանը, օժտ-
ված է նուրբ հոգեբանությամբ, և Զարդարյանը, գերծ մնալով մերկապարանոց
քննադատութիւնից, նրան ներկայացնում է իր կանացի բոլոր թուլութիւններով
ու բանականութեան դրսևորումներով: «Կմտածեր թե ինք ալ ամեն կնկա պես
սիրտ ուներ, սրտի տեր մը ուներ ու հետևաբար կբաղձար ծառի մը տակ շքա-
վորիլ, մինչդեռ գեղեցկութիւն, հրապույր, թարմութիւն ամենքն ալ ճամփու հա-
յելով անցեր գացեր էին: Հացը հաց էր վերջապէս, մարդ տոխով մըն ալ կրնար
կշտանալ, մատ մը պանիրով ալ. թող էրիկը քովն ըլլար, ամեն իրիկուն գոտին
իր գլխուն վրա քակեր, շատ գիշեր ալ անոթի կպառկէին»: Զարդարյանը ողբեր-
գական նոր շերտեր է բացում Նունիկի ներաշխարհում. «Յետո, ո՞վ գիտեր թե
էրիկը օտար քաղաքի մեջ, ուր գեղեցկութիւն շատ կա, ուր կնիկները աչքով,
բերնով, քայլվածքով կհրապուրեն ու մարդիկը իրենց կկանչեն, կըսեն, հավա-
տարիմ կմնար իրեն. ի՞նչ գիտնար թե հաճույքներուն ետևեն ինքզինքը ուզա-
ծին պէս չէր գրոսցներ»: Զարդարյանն իր հերոսուհու դրաման հասցնում է կա-
տարելության, երբ կերպարի մեջ կռիվ են տալիս երկու տարբեր կանայք՝ «Այս
բռնորեն ետքը տակալվին կմեղադրեր իր էրիկը, որ ձգեր գացեր էր զինք՝ առանց
գլխուն վերև ըլլալու, քանի որ առանց թիկունքի էքսյուկ-էքեկ մըն էր ինք ու
շուտ կրնար ծռիլ, երեքիլ ամեն հովե»:

«...սակայն հոգիեն ուրիշ ծայն մըն ալ կպոռար իրեն՝ թե ինք անզգամ կնիկ
մըն էր, բյուր անգամ անարժան անոր՝ որ օտարին դռները գլուխը հազար քարի
կգարնէ ու վաստակածը տուն կբերէ, թե էրկան բոլոր թերութիւնները, անհո-
գութիւնը երբեք կամավոր չէին, թե ամեն պարագայի տակ պարտավոր էր ինք
իր առաքինութիւնը ծյունի պէս մաքուր պահել, անով ապրիլ ու անով մեռնիլ»:

Պակաս դրամատիկ չէ նաև պանդուխտ Սիմոյի կերպարը, ով, իմանալով սոսկալի եղելությունը, բաժանվում է կնոջից և լքում զավակներին: Ի դեմս Սիմոյի՝ Զարդարյանը ներկայացնում է տղամարդկային արժանապատվությունը ուսմահարված անձնավորության, ում համար դավաճանությունը հավասարագործ է դժոխքի: Այն կասկածը, թե ինքը միշտ խաբված է եղել, և երեխաները իրենցը չեն, նոր հարված է հասցնում նրա խորտակված եությանը: Իսկ հասարակության կարծրացած օրենքները՝ Սիմոյի երկրորդ ամուսնությունն արգելելը, հերոսի դրամատիկվը հասցնում են բարձրակետի:

«Գավառական կյանքի սոցիալական և բարոյական ավերումը, մեր խուլ, հետամնաց միջավայրի սարսափելի տրագեդիան արտահայտված է Ռուբեն Զարդարյանի «Սև հավը կանչեց» գրվածքի մեջ, համառոտ և ամփոփ, բայց կենդանի գծերով և ապրած հոգեբանությամբ», - ընդգծում է գրականագետ Սիմոն Դակոբյանը:

Զարդարյանի նորավեպերում մեծ մասամբ ներառված է քայքայվող ընտանիքների անդամների հոգեկան դրաման: Ուշագրավն այն է, որ յուրաքանչյուր նովել՝ կյանքի արտապատկերման և կերպավորման ձևերով ու շեշտադրումներով, չի կոկնում մեկ այլ երկի: Ամեն մեկում Զարդարյանը տվել է իրականության մի կողմը և ստեղծել միանգամայն տարբեր հոգեբանության ու մտածողության տեր հերոսների: «Զավակը» երկում դարձյալ փլուզվող ընտանիքի պատմությունն է՝ այս անգամ բոլորովին այլ դիտանկյունից: Զնդախտը (խուլերա) պատճառ է դառնում բյուրավոր մարդկանց վախճանի, այդ թվում և Սաունուկ աղայի, որի կինը երեք երեխայի հետ աննկարագրելի տառապանքներ է կրում: Կարճ ընթացքում չեն տուներ ավերակի է վերածվում, երբեմնի բոլոր բարեկամները երես են թեցում Սառայից՝ թողնելով նրան միայնակ ու անպաշտպան իր որբերի հետ: Զարդարյանը մի քանի պատկերի մեջ ամբողջացնում է դժբախտ կնոջը բաժին ընկած ողբերգությունը: Նա նրբորեն բացում է այն կնոջ հոգին, ով սովոր լինելով լավ կյանքի՝ ստիպված մուրացկանություն է աճում. «...երբ առաջին հանդիպող դռան ուռնակին երկնցուց ձեռքը՝ վարանում մը կեցուց զինքը, հագիվ տեղեն վերցուց ու ձգեց և աչքերին արցունքը հոսիլ սկսավ, լեզուն կարկամած էր, շրթունքը համր ու իրար փակած, ըսելիք բան մը չէր գիտեր, արհեստին բառերում անտեղյակ էր»: Ամենածանր հարվածը, սակայն Սառան ստանում է տարագիր որդուց՝ Ավետիսից, ով մահամերձ մորը նայում է արհամարհանքով և թուրքերեն հոխորտում.

-Չգե, ծո, ինչու՞ մայրս կ'ըլլա:

³ «Արեգ», Բ տարի, Բեռլին, 1923, էջ 301:

Զարդարյանի նորավեպերի տառապող հոգիների գերակշռող մասը կանայք են, և դա պատահական չէ: Ժամանակի մամուլի ուսումնասիրություններից պարզվում է, որ հայ կնոջը, մասնավորապես գավառաբնակներին նվիրված մեծաքանակ հոդվածներ ու ստեղծագործություններ կան: Նշենք թեկուզ դրանցից մեկը՝ Շահարիկի «Այրին» նովելը, որը 1903թ. բուռն քննարկումների նյութ դարձավ Կ.Պոլսի «Մասիս» թերթում: Երկի հերոսուհին՝ երեսունչորսամյա այրի Արուսյակը, կյանքը կապում է երեսնամյա թորոսի՝ ամուսնու եղբորորդու հետ: Ըստ հեղինակի՝ այրին այդ քայլին դիմում է և գիտակցված, և սեռային զգացումների թելադրանքով: Որպես կին՝ միանգամայն ընդունելի համարելով Արուսյակի սեռական ցանկությունը՝ Շահարիկը, այնուամենայնիվ, հերոսուհուն մղում է գիտակցական գործողության: Մի կողմից՝ բազմանդամ ընտանիքի հոգսի ծանրությունը և տան տղամարդու բացակայությունը, մյուս կողմից՝ այրու հոգևոր և մարմնական սիրո կարոտը և գյուղի վավաշոտ տղամարդկանց հայացքներն ու ակնարկները գրողին ստիպում են որպես լավագույն ելք՝ նշել Արուսյակի և նրա զավակներին հարազատ դարձած թորոսի ամուսնությունը:

Արևմտահայ գրագետներից մեկին՝ Օնիկ Չիֆթե-Սարաֆին, այս երկը լուրջ խորհելու և մտահոգվելու տեղիք է տալիս, որն էլ նրանում առկա մի քանի կարևոր կետերի վրա սևեռելով իր ուշադրությունը՝ հարցում է ուղղում գավառի գրիչներին՝ նրանցից առավելագույնը իմանալու գավառի բարոյական վիճակի վերաբերյալ: Մասնավորապես, Չիֆթե-Սարաֆին ապշեցնում է նորավեպի հերոսուհու այն մտորումը, թե ինքը կարող է թորոսի հետ ամուսնությանը հագուրդ տալ կանացի ցանկությանը, քանի որ «...ապօրինի հարաբերությունները որոնք կը վիստային իր բոլորտիքը...», կարդարացնեն իր ցանկությունը: Չիֆթե-Սարաֆն ուզում է իմանալ, թե արդյո՞ք այդաստիճան բարքերի անկում կա գավառներում: Նրա հարցմանն արծագանքում են թե երկի հեղինակը և թե գավառագիրներ խոսքով Քեչիշյանը, Հովհաննես Գազանձյանը և Ռուբեն Ջարդարյանը: Բոլորն էլ տարբեր ձևակերպումներով հաստատում են գավառներում առկա բարոյական տագնապահարույց վիճակը՝ նկատելով, թե կնոջ սայթաքման պատճառը սոցիալական անբարենպաստ պայմաններն են և տղամարդկանց պանդխտությունը: Զարդարյանն իր «Բարոյականը գավառներու մեջ» («Մասիս», Կ.Պոլիս, 1903, համար 30) հոդվածում խորամուխ է լինում տարագրության առաջ բերած աղետալի հետևանքների մեջ, որոնցից ամենագլխավորը ազգապղծությունն է՝ հարսի և տեգրոջ, հարսի և սկեսրայրի, փեսայի և քենու կամ նմանօրինակ խայտառակ կապերը: Այդ երևույթների մեջ զրազետը, սոցիալական չարիքից բացի, տեսնում է օտար, մասնավորապես «գաղիական» (ֆրանսիական) բարքերի ներթափանցում: Ըստ Զարդարյանի՝ պատճառների ցանկում մի առանձին տեղ ունեն նաև տարիքային առումով անհամապատաս-

խան ամուսնությունները, երբ 10-12 տարեկան տղային կարգում են 18-20-ամյա աղջիկների հետ: Բնական է, որ հասուն օրիորդը, իր կողքին չունենալով կայացած տղամարդ, չի կարող մի քանի տարի սոսկ որպես աշխատուժ մնալ ամուսնական հարկի տակ՝ պահպանելով առաքինություն: Ձարդարյանն անընդունելի է համարում մեկ այլ իրողություն ևս. 16-17 տարեկան աղջիկների զուգավորման փաստը 28-30-ամյա տղամարդկանց հետ. «ընկերային բարոյականի տեսակետով աղետալի բան մըն է», - եզրահանգում է գրողը: Մյուս կողմից էլ Ձարդարյանը սխալ է համարում ծնողների կամքով կամ առանց ընտրության ամուսնությունները, որոնք շատ դեպքերում ամուսիններին կանգնեցնում են ապահարզանի փաստի առջև: Բոլոր այդ դրսևորումները՝ ազգի բարոյական առողջությանը սպառնացող, ծնունդն են առաջին հերթին սոցիալական և նրանից ածանցյալ հոգեբանական գործոնների: Իսկ դրանք նվազեցնելու լավագույն միջոցը, ըստ Ձարդարյանի, սիրո հիմքի վրա կայացած ամուսնությունն է: Արձակագիրը խելամտորեն է մոտենում ազգակործան խնդիրներին. սիրող կինը միայն կարող է տարիներով սպասել ամուսնուն, սիրող կինը չի դավաճանի կողակցին, ամեն պարագայում կմնա անբիծ:

Ձարդարյանի նկատած բոլոր էական կողմերն էլ արտացոլված են նրա երկերում: «Վա՛խ, ես մեռնեի» նորավեպում ծնողների ցանկությամբ ամուսնացած կնոջ դժբախտությունն է, «Սև հավը կանչեց»-ում տարագրության դառը պտուղները ճաշակած կնոջ բարոյական անկումն է: Ձարդարյանի դիտանկյունից հայ կնոջ եղերականությունն ավելի խոր արմատներ ունի: Ժամանակին նա տեսություն է ցանկացել գրել այդ մասին, որն այդպես էլ անավարտ է մնացել: Սակայն մի հրապարակման մեջ՝ «Խարբերոցի կնիկը» վերնագրով վերոնշյալ տեսության շրջանակներում («Ծաղիկ» շաբաթաթերթ, Կ.Պոլիս, 1903, համար 36), Ձարդարյանը բացահայտում է խնդրին առնչվող ավանդական մի կարծրատիպ. «Հազիվ աղջիկ զավակը գլուխը գետնին վրա, աշխարհի իր առաջին լացը կուլա և դայակը՝ հոր ու բարեկամի աչքի լույսը կը բաշխե, ընտանիքի մեծերուն դեմքն ի վար դժգոհ տրամադրության մը հոգեկան արտահայտությունը կը կախվի՝ կըսես ուրիշ լաց մըն ալ իրենց իրեսին՝ սխալ ապսպրանք մընդունող մարդու անբավարարությամբ»: Ձարդարյանը նրբին հոգեբանությամբ գտել է հայ ազգի մտածելակերպի մի ուրույն դրսևորում, այն է՝ հենց ծնված օրվանից աղջիկ զավակի համար շատ չուրախանալը և արու զավակին ստորադասելը: Թերևս սա է պատճառը, համաձայն Ձարդարյանի դիտարկման, որ հայ ընտանիքներում մինչ ամուսնանալը աղջիկը անհրավոր են է համարվում, շատ հաճախ ծնողները վերաբերվում են նրան որպես ծախու ապրանքի: «Սիրելիներու հեռակայության առթած սրտմաշուքները, կսկիծները, թերևս անհարմար ամուսնության մը անտրտունը հնազանդությունը և իր

կյանքին դեռ բոլոր մյուս զոհաբերությունները՝ կարմիր մարդուն են որ կը կապեն անոր քունքեն ու ծակտեն, մկրտության ավագանեն առաջ: Անեծքին սկզբնավորությունն է ասի».- եզրակացնում է Ջարդարյանը:

Կանանց հիմնախնդիրներին նվիրված այլ հրապարակումներ ևս ունի Ջարդարյանը, սակայն բավարարվենք այսքանով և վերադառնանք մեր բուն թեմային: Այժմ անդրադառնանք այն միջոցներին ու եղանակներին, որոնց շնորհիվ Ջարդարյանին հաջողվել է հոգեբանական տիպարներ ստեղծել և ի ցույց դնել նրանց հոգեկան խռովքը: Ընդհանրապես Ջարդարյանի նորավեպերին հատուկ չեն երկխոսություններն ու կոնֆլիկտները, որոնցում ավելի վառ են դրսևորվում հերոսների հոգեվիճակներն ու մտահուզանքները: Ջարդարյանի հերոսները լուռ են, ինքնամոկո. նրանք իրենց ներսում կրում են մեծ տառապանքներ և ոչ ոքի հաղորդակից չեն դարձնում իրենց վշտերին: Ջարդարյանն այդ եղանակով կարծեք թե ընթերցողին տեսանելի է դարձնում իր կերպարների հոգու ցավերը խորությամբ: Այսինքն՝ կարելի է որոշակիորեն ասել, թե գրողի կերտած հերոսները լռությամբ, իրենք իրենց ցավի մեջ ու ցավի հետ ասում են առավելագույնը մարդկային տառապանքների մասին: Լռությամբ ու ինքնապարփակմամբ՝ հոգեդրամա պատկերելու այս գիծը հետագայում շարունակել ու զարգացրել են Համաստեղը և Ակսել Բակունցը, ընդ որում՝ չափ հաջող կերպով: Հատկապես Ա. Բակունցի մոտ, ինչպես նրբորեն նկատել է գրականագետ Սերգեյ Աթաբեկյանը, այդ եղանակը դարձել է ստեղծագործական սկզբունք և գեղարվեստի չափանիշ:

Ջարդարյանի ցանկացած նորավեպում պարզորոշ ուրվագծվում է կերպարաստեղծման այդ գիծը: «Քահանան ոչ երկչուտ էր, ոչ տկար, բայց իր շուրջը տեղի ունեցող այս անսովոր փոփոխությունը, հայտնի սպառնալիքը՝ որ երկաթե ատրաշեկ շրջանակի մը ուժով հետգհետե կը նեղնար, կը ճնշեր ու իր հոգիեն կը դպնար՝ անհանգիստ կ'ըներ զինքը. հեռավոր եղբայրներու խողխողումին ու կոտորածին պատկերը՝ կը ցնցեր իր սիրտը, կը հաղորդեր անոր արևելություն, տրտմություն ու խռովք» («Եկեղեցիին առյուծը»): «Տերտերուն հարսը, առանց ուրիշին խոսքին ու խրատներուն, ինքն իսկ արդեն բոլորեն աղեկ գիտեր իր վիճակին ծանրությունը, սակայն նոր ամուսնություն մը, որքի տեր մոր մը նոր պսակը՝ իր մայրական սրբությանը վրա եկած խավար մըն էր, իր զավկին իրավունքներուն դավադրություն մը, այդ որքը երկու անգամ որբացած պիտի ըլլար՝ ապավինելով խորթ հոր մը, խորթ եղբայրներու օտար պաշտպանությանը» («Տերտերին հարսը»): «Բայց ինչ ալ ըլլար իր ծննդյան արժեքի վավերականությունը, որքան աղքատի ալ ըլլային իր աղքկության լաթերը, բավական էր որ իր բախտին դռնակը անսպասելի երջանկության մը վրա բացված էր ու իր երիկը իր ոսկին պատվանդանին, իր ազնվականի դիրքին

մեջ ամբարտաժան՝ իրավունք չունեի այդ ամենով ապտակելու զինքը ու հինգած լաթի մը պես մեկ կողմ նետելու, ատեն մը անոր նորությունը, անոր հրապույրը անստորոհեմ վայելելե ետք » («Վա՛խ, ես մեռնեի »):

«Որու՞ ըսեր, թե էրիկը ամեն օր իր իսկ աչքին առջև, իր ականջին տակ իրեն պատկանող իրավունք մը հրեշային անհոգությամբ ու համարձակորեն կշռայլեր իր ներքոջը» («Սև հավը կանչեց»):

«Տան սերը» նորավեպի Կով Առաքելը Ջարդարյանի ամենալուռ հերոսն է՝ այդ բառի ամենալայն իմաստով: Նորավեպի սկզբից մինչև վերջ Կով Առաքելը կարծես լուրջան սիմվոլ լինի՝ բացառությամբ մեկ-երկու դրվագի, երբ նրան տեսնում ենք բարկանալիս կամ վիճելիս: Մեկանխուլիկ խառնվածքի մի կատարյալ տիպար է Առաքելը, որի ողբերգականությունը պարփակված է լուրջան խորխորատներում: Տպավորիչ է հատկապես այս ստեղծագործության վերջաբանը, երբ որդուն ու կնոջը կորցրած միայնակ Առաքելին տանում են տնից՝ հանձնելու բարեկամի խնամակալությանը: «Ու բաժնվեցավ տունեն ինչպես մորթը կբաժնվի մարմինեն ու եղունգը միսեն. բոլորովին ապուշ կտրած էր այդ օրը. լուռ ու անզգա՝ կնայեր հեղ մը ասոր երեսը, հեղ մը անոր, երբ վերջապես թևեն բռնած առին տարին զինքը. կուլար ջանկան մը աչքերով՝ որքան գուցե երբեք լացած չէր ոչ իր տղուն, ոչ ևլ կնկան դագաղին ետևեն. տունը այդ օրն էր ավեր, ու գնաց ցավով, հոգեկան անդարմանելի խշխիշով»: Իր գոյությունը տան սիրուն քարշ տվող, ծնուն սառնամանիքներից պատերը ծյան ծածկույթից ազատելու առաքելությամբ ապրող Առաքելի համար հարազատ օջախից բաժանվելը հավասարագոր է մահվան: «Տան սերը» նորավեպը, մեր կարծիքով, Ջարդարյանի լավագույն երկերից մեկն է, նախևառաջ՝ Կով Առաքելի կերպարի շնորհիվ:

«Ապահով իմ որ Ջուլա ավելի լավ չպիտի կրնար պատկերացնել այդ Կով Առաքելն ու իր շրջապատը»⁴, - դիպուկ է բնութագրել Երուխանը: «Այդպիսի տիպեր և այդպիսի հոգեբանական սիրտ տրորող վերլուծումներ մենք հաճախ չենք պատահած մեր գրականության մեջ, վերլուծումներ, որոնք հիշեցնում են ռուս նշանավոր արձակագիրներին, մասնավորապես Դոստոևսկուն»⁵, - նշում է Սիմոն Զակոբյանը:

Իբրև ամփոփում՝ կարող ենք ասել, որ Ռուբեն Ջարդարյանի նորավեպերում առկա բազմաթիվ դրամատիկ հոգեվիճակները փաստարկված են և արտացոլված հոգեբան գրողի վարպետությամբ:

⁴ Գրական ասուլիսներ, Դ. Կ. Պոլիս, 1913, էջ 22:

⁵ «Արեգ», Բ տարի, Բեռլին, 1923, էջ 229: